

Etxebizitza eta ingurugiroan udalen egoera ezagutu nahi du Jaularitzak

EUDEL eta administrazioaren arteko bilera izan zen atzo

Etxebizitza eta Ingurugiro saila eta EUDELen arteko bilera izan zen atzo Gasteizen, «elkarlanerako kolaborazioaren bidea urratzeko». Inkestak bidez, udalek etxebizitza eta ingurugiroaz duten egoera ezagutu ahal izango du Jaularitzak.

LUIS KARLOS GARCIA / GASTEIZ

EAEko Udalen Elkarteko (EUDEL) ordezkariak, Jon Larrinaga Hirigintza, Etxebizitza eta Ingurugiro sailburuarekin eta Xabier Garmendia Ingurugiro sailburuordearekin bildu ziren atzo Gasteizen. EUDELeko lehendakaria den José María González Zorrillaren esanetan, Eusko Jaularitzako «sailak legegintzaldi honetarako dituen asmoez jabetzeko parada» izan zen alde biek atzo egin zuten lehendabiziko bilera.

Jon Larrinagak elkarriketaren ostean EUDELeko lehendakariarekin eginiko prentsaurrekoan, «lanean elkarrekin jartzen hasteko» kontaktua izan zela adierazi zuen, «egunez eguneko lana bait da etxebizitza nahiz gai handia den ingurugiro arloan egin behar dena».

Beren egoera sakonago ezagutzeko xedez, inkesta batzuk bidaliko zaizkie EAEko udalei «kolaborazioarako lehen pausu bezala». Etxebizitzan udalen asmoak zeintzuk di-



«Lanean hasteko prest» daude Hirigintza saila eta Eudel.

OLALDE.

ren du aurreneko helburua aipatu inkestak, eta gainera, ingurugiroaz «udalen kontzientzia piztea» bilatzen da.

MAILEGUEZ BALIATUKO DIRA

Udaletako etxebizitzek duten metro karrutuko batezbesteko prezioa zein den, etxebizitzak erakitze beharrak zeintzuk diren edo babes ofizialeko zenbat etxebizitza behar diren jakiteko galderak egiten ditu inkestak. Gainera, Larrinagak esan zuenez, «gure jokabidea baldintza egokietako maileguak udalei eskaintzea denez gero, arlo honi buruzko itaunak ere egiten dira».

Lur-eremuaren ordenazioari

ekingo zaiola komentatu zuen sailburuak halaber eta lehenbiziko zirriborroa udal nahiz diputazioei igorriko dietela gaineratu zuen. EUDELeko lehendakariak deklaratu zuenez, elkarrekin honen barruko «informazio batzordea» eratuko dute, irailtik aurrera «lan egiteko egutegi bat burutuko duena».

Xabier Garmendia sailburuordeak ingurugiroaz aipatu zuen bezala, «udaletan arlo honetaz bereziki dagoenik ia ez dela somatu dugunez, ingurugiro teknikariak hezitako ikastaroen zehaztasunak ematen hasiko gara irailen». Udaletan gai honetaz «interlokutoreak» izateko go-goa agertu zuen.


Osakidetzak langileen soldatak murriztu nahi ditu LABen arabera

DONOSTIA

Osakidetzak % 10eko deskontua egin nahi die larrialdietako langileei ordainketa guztietan, LABek atzo igorritako salaketa oharrean jasotzen denez. Jabier Arizabaletak, Administrazio eta Lan Antolaketa zuzendariordeak sinatutako txosten batean azalduko litzateke neurri honen ezarriera, beti ere LABekoen arabera.

Jaitzieraren arrazoia zera liteke: aipatutako langileek 1988. urtean Osakidetza, UGT eta ELAK erabakitako urteko 1650 orduak

ez betetzea, baina LABek salatu duenez, ordu hauek ez betetzea Osakidetzaren beraren errua da, erakundea bera izan bait da ordutegi murriztagoak ezarri diena langileei. Sindikatuak azaldu duenez, erabaki hau ez zaio sendagile kolektibo osoari ezarriko. «Zergatik diskriminatzen dituzte mediku batzuk eta beste batzuk ez?» galdetu du LABek kalera-tutako agirian. Oharrean gaineratu duenez, soldata murrizketa jasango duten langileen lanorduetan % 60tik gorakoa gau edo ta jai egunetakoa izan da.



Osakidetzaren «diskriminazioa» salatu du LABek.

JOXEAN GOYA.

Azterketarik ez egiteko deia egin dute irakasle kaltetuek

I.ESKISABEL/BILBO

Ekainean azterketarik egin ez zuten Informazio eta Gizarte Zientzien Fakultateko irakasleek, uztailearen 26 eta 29rako egin diren azterketa deialdietara ez joateko eskakizuna egin diete azterketarik egin gabe dauden ikasle guztiei. Horrez gain, aipatutako azterketa hauek irailen egingo direla esan dute, bi deialdiak hil horretarako gordeaz, atzo zabalduko oharrean adierazten dute-nez.

Gainera azterketa hauek ez dira «legezkoak» irakasle multzo honen arabera, ez bait dute beraietan kaltetutako departamentu eta sekzioetako irakasleek parte hartuko. Beraz, inpugnatuak izango dira, eta inongo baliorik gabe gertatzeko arriskua dute.

Gainera, ikasleen eskubideen bortxaketa dira examina hauek, aurreko iturrietara joz, «azterketa egingo duen tribunalak, ez bait daki ikasgai hori nola eman den, irakasleak ebaluaketa egiteko garaian zein irizpideri segitu dion, eta lanak eta tarteak examina ez dituelako kontutan hartzen», aditzera ematen da hitzez hitz.

Honez gain, tribunalen aurrera aurkezten diren ikasleek ez dute

inongo emaitzarik izango irakasle on aktetan, beraiek iragarri bezala. Ondorioz, ikasgaia ez badute gainditzen, aurrerantzean tribunalaren aurrean egin beharko dute azterketa ikasle hauek. Honen arrazoia zera litzateke, zenbait departamentu eta atal ez direla kontutan izan azterketa hauetarako deia egitean, eta hauek ez dute beraien gain hartzen «ez legezkotzat» jotzen duten deialdi hau.

Hala ere, irakasleek ez dute inongo oztoporik jarriko examina egiteko garaian, «nahiz eta azterketa egunetan bertan egon ikasleei sortu daitezkeen arazoak berri emateko, eta tribunalen osaketa eta probak nolakoak diren ikusteko» oharrean azaldu bezala. Gertatutako guztiaren akta jasoko dutela ere azpimarratzen dute.

Azkenik, irakasle hauen iritziz, deialdi honen helburua ez da ikasleen alde egitea, baizik eta beraiei espedienteak zabaltzeko aitzakia bat izatea eta ikasleak elkarren aurka jartzea.

Honela, aurrez hondatua zegoen elkarbizitza unibertsitarioa gehiago kaltetuko litzateke. Bestalde, ekainean azterketarik egin gabe gelditu ziren ikasle batzuk, tribunalei boikota egiteko asmoa agertu dute.

Grebetako zerbitzu minimoak arautzean han egon nahi du UCEk

L.K.G. / GASTEIZ

Euskadiko Kontsumitzaileen Elkartek bere «haserre» agertu zuen atzo grebetako zerbitzu minimoen erregulazioak akordioaren eztabaidan parte hartzea deituta ez izateagatik. Martin Auzmendi Eusko Jaularitzako Lan sailburuak sindikatu eta patronalari proposatu zien arautze akordioarekin «ados» dago UCE, atzo prentsa ohar batez jakin erazi zuenez, «kontsumitzaileen mugimenduak azken hilabeteotan egin duen eskaera bait da». Hala eta guztiz ere, datorren irailen hasiko den erregulazioa saioan izatea eskatu zion kontseilariari.

Martin Auzmendik proposamena egiterakoan erabili zituen argudioak dira, UCEren ustetan, kontsumitzaileen elkarrekin honek atzo aditzera eman zituenak. «Biztanleen eskubide eta langileek greba egiteko daukaten arteko oreka batera iristea helburu dela», oinarriko zerbitzuen batzordeetan kontsumitzaileen elkarrekin ordezkagarrienen esku sartzea ezinbestekoa da UCEren iritziz.

Azkenaldi honetan, gatazkak konpontzeko «eztabaida sozialaren giroa» aregotuz doala, Auzmendik planteatu zuenarekin bat azaldu zen UCE. «Egia da garai egokia dela oraingoa, eta hain zuzen, elkarriketa eta aniztasun giro horrek bultzaturik, prozesuan parte hartu nahi dugu», gaineratu zuen UCEk. Egoera sozial eta ekonomikoaren normalizatzarako nahiz gatazka sozialak

gutxiagotzeko izan liteke sartze hori hain iritziz.

UDAKO SUTEN ERAGINA

Bestalde, uda parteko suteek eragiten dituzten kalteen gaia aipatu nahi izan zuen UCEk atzo beste prentsa ohar baten bitartez. «Uda honetan pasa diren egunetan, hogeitabost mila hektarea erre dituzte orain arteko suteek eta berrogeitamar urte beharko dira txikituta geratu diren paisaiak berregiteko. Guzti hau ikusita, «inoiz baino kontu handiagoz ibiltzeko deia» egin zuen UCEk.

Europako bigarrena izan zen iaz Espainia suteen kopuruari dagokionez, eta guztira, 15.141 sute gertatu ziren. Erretako hektarea kopuruaren aldetik lehendabizikoa izan zen, hala ere: 200.658, zehatz-mehatz.



PASAIKO UDALA

IRAGARKIA

Udal Plenoak onartua duela-rik «Trintxerpeko Jubilatuen Etxearen konponketa» obra-proiektua, 7.020.519 pta.ko presupostuarekin, kontratistek jakinerazten zaie plikak entregatzeko epea datorren abuztuaren 3an amaitzen dela, dokumentazioa Udal honetako Obra-Departamentuan jaso ahal izango dutelarik.

Pasaia, 1991ko uztailearen 16an
ALKATEA

Sercosaren janariak toxikazioak eragin ditu Nafarroa eta Gasteizen

Sercosa enpresa iruindarrak banatutako janariak toxikazioak eragin ditu Nafarroako udako kanpamentuetan eta Gasteizko 'Europa Cantar' musika olinpiadako abeslarien artean, ofizialki oraindik baieztatu ez bada ere.

Toxikazioak jota hogeitamabi pertsona ingresatu zituzten atzo Iruñeko ospitaleetan. Toxikazioak janariak eragin dituela pentsatzen da, medikuek oraindik ziurtatu ez duten arren. Sintomak sukarrak, beheakoa eta botagalea dira.

Bi irakasle ezik, beste toxikatu guztiak hamabi-hamalau urteko gaztetxoak dira, egun batzuetarako Nafarroako Gobernuak antolatutako uda kanpamentuetara etorriak. Ingresatuetako hogeitabat Ultzamakoak ziren, sei Bertizkoak, lau Orbaizetakoak eta bakar bat Getadarrekoa. Bi irakasleak Nafarroako Ospitalean daude eta gainerakoak Virgen del Caminon. 'Europa Cantateko' antolatzaileek oraindik baieztatu ez duten arren, lehiaketan parte hartzen dutenen artean berrehun pertsona inguru kaltetu ditu toxikazioak.

Txagorritxu Ospitaleko larrialdiko zerbitzuetatik sei pertsona beste-rik ez ziren pasa atzo, baina, kalte-ak askoz ere gehiago izan daitezke.